

NAROD I PRAVDA

Elvedin Okerić

Zastupnik u Skupštini Kantona Sarajevo

Sarajevo, 30.10.2019.godine.

VLADA KANTONA SARAJEVO

Ministarstvo obrazovanja, nauke i mladih Kantona Sarajevo

PREDMET: ZASTUPNIČKA INICIJATIVA

U saradnji sa Vijećem roditelja Srednje škole Peta gimnazija podnosim inicijativu o nabavci skijaške opreme za učenike ove škole.

OBRAZLOŽENJE

Peta gimnazija je jedina **srednja škola u Bosni i Hercegovini koja** zajedno sa ostalim smjerovima **ima i sportski smjer**. Takav smjer učenicima omogućava, da uz redovne školske aktivnosti mogu neometano ispunjavati sve svoje sportske obaveze. U sklopu sportskih aktivnosti po nastavnom planu i programu, učenici se podučavaju osnovnim skijaškim tehnikama.

Za te nastavne aktivnosti, obavezna je skijaška oprema koju ova srednja škola ne posjeduje, te učenici i roditelji učenika samostalno nabavljaju opremu - kupovinom, pozajmicom ili iznajmljivanjem. Često se oprema ne kompletira ili se to ne uradi blagovremeno, **što roditeljima učenika, pored velikog finansijskog opterećenja predstavlja i organizacioni problem a školi i učenicima onemogućava adekvatno izvođenje sportske nastave.**

Molimo da uzmete u obzir da je skijaška oprema za učenike obavezna i da škola ne posjeduje opremu a roditelji pored redovnih finansijskih izdataka za školovanje djece, najčešće nisu u mogućnosti obezbijediti novac.

S obzirom da je u toku priprema Nacrta budžeta za 2020. godinu, a da početak ove nastave počinje 2. januara molimo Vas da zajedno sa direktoricom Pete gimnazije planirate potrebna sredstva koja su neophodna, a koja bi omogućila kupovinu neophodne skijaške opreme i olakšala roditeljima i učenicima izvođenje sportske nastave kao i drugih obaveznih sportskih aktivnosti kao što je npr. plivanje.

Elvedin Okerić

NAROD I PRAVDA

Elvedin Okerić

Zastupnik u Skupštini Kantona Sarajevo

Sarajevo, 30.10.2019.godine.

VLADA KANTONA SARAJEVO

Ministarstvo saobraćaja Kantona Sarajevo

PREDMET: ZASTUPNIČKA INICIJATIVA

Pokrećem inicijativu da se na dijelu ulice Azize Šaćirbegović na dionici saobraćajnice od zgrade „Bosmala“ do „Robota“ Hrasno postavi horizontalna i vertikalna signalizacija, video nadzorni sistem za mjerenje brzine kretanja vozila kao i „ležećih policajaca“.

OBRAZLOŽENJE

Građani naselja Hrasno već duži niz godina se suočavaju sa problemom brze vožnje nesavjesnih vozača u ulici Azize Šaćirbegović, na dionici saobraćajnice od zgrade „Bosmala“ do „Robot“ Hrasno. Zbog već kontinuirane prakse brze vožnje na pomenutoj dionici, građani Hrasnog su iskazivali svoje nezadovoljstvo takvim stanjem i pisali peticije nadležnim institucijama, međutim nikada nije riješena ova problematika. Poznato je da je ova ulica prometna i da se u neposrednoj blizini nalaze škole i dr.

Potrebno je u Budžetu Kantona Sarajevo iznaći sredstva za postavljanje vertikalne i horizontalne signalizacije, ležećih policajaca“ ili video nadzornog sistema za mjerenje brzine kretanja vozila, a sve u cilju stvaranja sigurnijeg ambijenta kretanja pješaka na ovom dijelu naselja Hrasno.

Elvedin Okerić

NAROD I PRAVDA

Elvedin Okerić

Zastupnik u Skupštini Kantona Sarajevo

Sarajevo, 30.10.2019.godine

VLADA KANTONA SARAJEVO

Ministarstvo zdravstva Kantona Sarajevo

PREDMET: ZASTUPNIČKA INICIJATIVA

Pokrećem inicijativu prema Miistarstvu zdravstva Kantona Sarajevo da organizuje rad Područne ambulante u naselju Binježevo u skladu sa potrebama stanovništva.

OBRAZLOŽENJE

U naselju Binježevo, općina Hadžići je 03. oktobra 2013. godine otvorena ambulanta „Meram“ čiju je izgradnju finansirala općina Meram iz Konye, koja je pobratimljena sa općinom Hadžići. Projekat izgradnje ambulante je realizovan posredstvom Turske agencije za saradnju u koordinaciju (TIKA) koja je izdvojila **440.000,00 KM**. Ukupan uloženi iznos za izgradnju predmetne ambulante je **770.000,00 KM**. Ambulanta je napravljena za dva tima porodične medicine i doktora stomatologije.

Prema zvaničnoj stranici Javne ustanove Dom zdravlja Kantona Sarajevo, Organizaciona jedinica Dom zdravlja Hadžići pruža primarnu zdravstvenu zaštitu za 28.349 stanovnika koji žive na području općine Hadžići, a koja pokriva područje od 273 km². Prema podacima sa zvanične web stranice Javne ustanove Dom zdravlja Kantona Sarajevo, broj stanovnika koji bi primarnu zdravstvenu zaštitu trebali dobiti u Područnoj ambulanti Binježevo je **5027**, među kojima se nalazi veliki broj djece, RVI, starih i iznemoglih osoba.

Nažalost, šest godina nakon otvaranja u ambulanti **u potpunosti ne radi niti jedan tim ljekara**, te trenutno područna ambulanta u Binježevu radi **samo dva dana u toku sedmice** (utorak i petak).

Na inicijativu MZ „Binježevo“, prošle godine u mjesecu oktobru, aktivisti mjesne zajednice su uradili peticiju u cilju da se obezbijedi rad Područne ambulante Binježevo u skladu sa potrebama stanovništva, te su od kuće do kuće anketirali građane garantujući im da će

ambulanta raditi svaki dan u dvije smjene, ukoliko svaki mještatinin da svoj pismeni pristanak da mu se zdravstveni karton prebaci iz Doma zdravlja Hadžići u Područnu ambulantu Binježevo. Radilo se o zahtjevu OJ Dom zdravlja Hadžići da se prebaci određeni broj zdravstvenih kartona iz Doma zdravlja u Hadžićima u Područnu ambulantu „Meram“ u Binježevo, kako bi se uspostavio rad ambulante. Tom prilikom prikupljeno je oko 400 potpisa, jer mještani nisu bili sigurni da će rad ambulante potrajati, što se nažalost i obistinilo.

Napominjemo da je na 20. sjednici Općinskog vijeća u Hadžićima koja je održana 31.10.2018. godine pokrenuta inicijativa da se pokrene rad Područne ambulante “Meram” Binježevo, tj. **da službe porodične medicine rade svaki radni dan puno radno vrijeme, s obzirom na činjenicu da Dom zdravlja Hadžići raspolaže sa 13 doktora, te je na osnovu navedene inicijative Javna ustanova Dom zdravlja Kantona Sarajevo obavijestila stanovnike Općine Hadžići da će Ambulanta “Meram” Binježevo tj. služba porodične medicine raditi svaki radni dan, puno radno vrijeme počev od 12.11.2018. godine.**

U novembru 2018. godine ambulanta počinje sa radom svaki dan (pet dana u sedmici) i to traje svega 5 mjeseci, nakon čega se od aprila 2019. godine opet ukida rad ambulante i pacijenti, kako bi dobili svoje pravo na zdravstvenu zaštitu, su ponovo primorani da idu u Dom zdravlja Hadžići koji je od naselja Binježevo udaljen cca 3,5 km, dok je od naselja Miševići udaljenost do Doma zdravlja Hadžići više od 6 km.

Zbog velikih gužvi u Domu zdravlja u Hadžićima, rukovodstvo OJ Dom zdravlja Hadžići ponovo šalje doktora da radi u Područnoj ambulanti u Binježevo, ali samo jednom sedmično po 2 sata, gdje se često znalo desiti da mještani čekaju ta dva sata i da opet ne budu primljeni, tj. da im se ne pruži osnovna zdravstvena usluga, te da budu primorani ponovo ići u Dom zdravlja Hadžići koji je u jednom smjeru udaljen više od 3 km. Zbog navedenih gužvi doktor se šalje u ambulantu 2 puta sedmično, te je u aprilu 2019. godine rukovodstvo OJ Dom zdravlja Hadžići obavijestilo stanovnike MZ Binježevo da će zbog nedostatka ljekara, usljed korištenja starih godišnjih odmora i korištenja novih nadolazećih godišnjih odbora ambulanta raditi samo dva dana u toku radne sedmice, a da će od mjeseca septembra početi sa radom 5 dana u toku radne sedmice. Odmori su prošli, a ambulanta svoje usluge stanovnicima MZ Binježevo i dalje pruža samo 2 dana u toku radne sedmice, što traje i danas.

Mještani Hadžića su ogorčeni jer su izigrani od strane rukovodstva OJ Dom zdravlja Hadžići i mnogi ponovo vraćaju svoje zdravstvene kartone u Dom zdravlja Hadžići, jer su na to primorani, iako ambulanta u Binježevo ima svu infrastrukturu koja je potrebna za rad jedne ambulante.

Nažalost, neko se igra sa preko 5.000 stanovnika općine Hadžići i MZ Binježevo uskraćujući im njihovo pravo na osnovu primarnu zdravstvenu zaštitu, te ovim putem zahtijevamo da se rad Područne ambulante „Meram“ u Binježevu uskladi sa potrebama stanovništva, te da ambulanta radi u vremenskom periodu od 08:00 – 20:00 sati, kako bi stanovnici MZ Binježevo dobili svoje pravo na zdravstvenu zaštitu koje im i pripada.

Elvedin Okerić
